

COMISION VISION 2000 TA PIDI:

Directiva di SAC mester sede puestonan y baha "en bloc"

ORANJESTAD(AAN): E prome recomendacion di Comision Vision 2000 na gobierno ta pa pidi e directiva actual di SAC na bienestar di Aruba su carnaval pa sede nan puestonan y baha "en bloc".

CONCLUSIONNAN

E conclusionnan di Comision Vision 2000 ta menciona cu despues di e reunionnan di Comision Vision 2000, reunion di e comision pa studia e informen entrega, y reunion di Petite Comite, Comision Vision 2000 a yega na e siguiente conclusionnan:

==Fundacion Stichting Arubaanse Carnaval, SAC, pa hopi aña no ta funciona debidamente.

==Carnaval di Aruba, debi na su mal maneho ta den un situacion critico cu si awor mas lihe posible- no gara e problema na su raiz, pa 1998 y despues, por wel di lubida riba celebracion di carnaval.

==Carnaval di Aruba a crece y sali for di control di e organizadoman, cual desarrollo tambe ta birando fatal si no restructura henter e evento. Su decadencia por a nota ultimo añanan.

==Rapport di Comision di Buena Voluntad, entrega na SAC na october 1993, a muestra cu "SAC ta hibando carnaval den un precipicio" tambe cu "SAC ta carece di un organizacion profesional".

E desorganizacion aki "a crea un malcontento entre tur gremio involvi den carnaval y cerca e pueblo carnavalesco cu no kier tende mas di SAC".

==SAC, aparentemente pa falta di vision, no a adapta su mes na transformacion moderno cu consecuencia cu el a keda atrasa y perde control riba carnaval.

==Comision Vision 2000 ta haya cu a bira tempo pa SAC duna gobierno e oportunidad pa por revisa estructura y maneho di e fundacion. Esaki ta cuestion di interes general y mester bay a base di respet mutuo.

==SAC mester por wordo restructura di tal forma cu e por goza di apoyo di un "Management Team" den cual por incorpora e lidernan actual como conseheronan y varios miembro di SAC den sub comisionnan ya cu tin trahadornan cu hopi dedicacion y experiencia tambe den SAC.

==Pa dirigi e Management Team, den Comision Vision 2000 tin varios persona cu

capacidad di por wordo encargu cu e tarea aki y forma su equipo.

==E estructura "nobo" di Carnaval di Aruba mester ta di tal forma cu e ta goza di respet di henter comunidad. E mester ta un organizacion cu ta opera y funciona 365 dia pa aña (cu excepcion naturalmente di dianan di fiesta).

==Carnaval a bira algo "nacional", algo di henter Aruba y cu ta concerni cada habitante di e isla aki.

RECOMENDACION

A base di e evaluacion general haci, y e conclusionnan, Comision Vision 2000 ta haci e siguiente recomendacionnan:

--1-- Pidi directiva actual di Stichting Arubaanse Carnaval, SAC, na bienestar general di Aruba su carnaval pa sede nan puestonan y baha "en bloc";

--2-- Instala e Management Team segun e estructura, organizacion y formulacionnan presenta, proponi pa Comision Vision 2000;

--3--Permiti Comision Vision 2000 pa apunta y propone na gobierno (pa aprobacion) nomber di e personanan cu lo forma e Management Team;

--4--Subsidia e Management Team cu e fondonan necesario. Riba e suma maximo pa cierto periodo, por delibera cu gobierno despues di presenta un presupuesto y asina tambe traha den direccion di bira self-supporting;

--5--Exonera e Management Team nobo aki di tur debe existente.

--6--Duna e Management Team te mas tarda fin di november 1997 pa presenta y aproba nan statuto;

--7--Acorda hunto cu e Management Team cu aki 3 aña e resultadonan di e sistema nobo aki lo ser evalua.

NOTA:

E notanan cu ta inclui ta muestra cu si no cumpli cu e recomendacionnan aki, Comision Vision 2000 ta mira pa futuro di carnaval:

A---Carnaval di Aruba lo caba na nada.

B---Un fiesta grandi si pueblota ser kita for di nan.

C---Un parti grandi di nos economia lo haya sla di mas duro hamas conoci, en particular nos turismo.

D---Comercio local lo bay sufrir perdidanan grandi cu lo por tin como consecuencia entre otro hasta retiro di empleadonan.

FIRMANTENAN:

E firmantenan cu a forma parti di Comision Vision 2000 tabata Sr. Joy Kock cu a presidi e reunionnan cu Sr. Virgil Koolman como secretario, Sr. Chido Henriquez como vice presidente, y sub comision; Sr. Bibi Arends coordinador carnavalesco, Sr. Robby Peterson Cuerpo Policial, Sr. John Flemming Grupo di Carnaval, Sr. Junior Geerman di DOW, Juby Naar periodista/columnista di carnaval, Sra. Marcia Stamper, Grupo di carnaval, Sr. Ruben Garcia, productor radial di carnaval, Sra. Marjorie Vermeer Luidens di ARMA, Sr. Errol Brown Grupo di Carnaval di Coastal Club, Sra. Maybeline Arends Croes y Sr. Lucio Rivandeneira, musiconan

RECHAZO DI PARTI DI SAC

Dia 17 di April Comision di Vigilancia apunta pa gobierno a reuni cu SAC en cuanto e rapport, y e dia

siguiente dia 18, SAC a entrega na president di e comision un carta fecha dia 17 di april, den cual SAC ta referi na e reunion entre Sres. Joy Kock, Virgil Koolman, Milo Croes y Sra. Carmen Loefstok, y ta menciona cu SAC tin e honor di participa e comision cu den e reunion di ayera anochi (17 di april 1997) a keda dicidi cu: Stichting Arubaanse Carnaval no ta acepta un Management Team, en vista cu "ya nos tin nos Management Team" consistiendo di e directiva, esta president, secretario y tesorero.

E carta a wordo firma pa president Milo Croes, Secretaria Tecla Kelly Hernandez y Tesorero Modesto Ruiz.

MINISTRO BEKE

Na entrega di e informe na president di Staten y na medionan di comunicacion, Ministro Lili Beke a expresa cu "lamentablemente den un carta di SAC a keda dicidi pa nan cu nan no ta acepta Management Team

ya cu nan mes tin nan Management Team cu "nunca nos a tende di dje".

Camaval di Aruba ya no ta un actividad solamente pa nos pueblo goza di dje, pero carnaval a bira un atraccion grandi pa nos turismo y den ultimo añanan, esaki a keda estableci ya cu hopi placa gobierno ta hinca den e promocion pafo di Aruba lunanan adelante y pa evita e obstaculonan y innecesarianan aki, a keda dicidi pa gobierno cu mester haci lo maximo pa e bienestar general di nos pais den temporada di Carnaval, segun e ministro.

El a expresa cu "awor cu e rapport ta cla, e lo ser evalua den ministerraad na unda un decision lo mester cay na bienestar general di e pais aki.

Gobierno a haci un apelacion riba e comision pa "keda activo te ora logra solucionnan duradero, preferiblemente prome cu juni di e aña aki".